

**25 IANUARIE**  
**RUGĂCIUNEA 2**  
**SF. IERARH-MUCENIC**  
**PETRU ZVEREV,**  
**ARHIEPISCOPUL VORONEJULUI**

**Молитва 2**

О, священная и многострадальная главо, земный ангеле и Небесный человеце, священномучениче и чудотворче Петре, архиерею Божий! Ты в годину лютых гонений явился еси яко церковное светило и истинныя веры утверждение, зане пред богоборцы дерзновенно Христа исповедал еси, и яко кадило благовонное, в жертву Богу себе принесл еси.

Яви нам, смиренным и грешным, ко святым мощем твоим притекающим, многомогущее твое заступление, и вкупе со всеми святыми, во отоцех Соловецких просиявшими, испроси у Господа всякий дар, коемуждо благопотребен ко спасению. Се бо грех наших ради не имамы дерзновения ко Господу и Владыце нашему, и праведный гнев Его на ны наведохом, и всякия милости Его недостойны сотворихомся. Темже, не смеюще возвести очеса наша к высоте Небесней, ниже молебный глас ко Господу, сердцем сокрушенным и смиренным духом тебе молитвенника благоприятнаго к Нему

предлагаем, и просим тя со усердием велиим: буди заступник и ходатай наш пред Богом, Судиею Праведнейшим, се бо выну прогневаем Его согрешении многими. Ныне убо, во славе Небесней пребывая и с лики святых непрестанно славословя Пресвятое Имя Господа, призри на нас, грешных, и избави всех, верою несумненною к Богу приходящих, от всяких бед, наветов и прилогов диавольских. Укроти волны страстей и искушений, востающих на ны, да ради святых твоих молитв не обымет нас напасть, и не погубим в пучине греховней и в тине страстей наших.

Вознеси, богоносне отче наш, сие малое моление недостойных раб твоих Владыце Христу, да утвердит землю нашу в правой вере и благочестии, Церковь Святую да сохранит непреобориму от ересей и расколов, и соблюдет невредиму от всякаго зла. Испроси у великодаровитаго Христа Бога нашего скорбящим утешение, недугующим исцеление, обидимым заступление, падшим во грехи покаяние и востание, страждущим от бесов скорое освобождение, от Церкви Христовы отпадшим вразумление и на путь спасения обращение. Ты мученически душу твою за веру положил еси, даруй и нам мужество подражати

тебе, да ничтоже в жизни сей временней  
возможен отлучити ны от любви Божия.

О, святителю Христов, огради и укрепи  
молитвами твоими град сей, да процветет в нем  
ревность ко спасению и благочестие. Ты,  
непрестанно о часе смертнем память имевый и  
благую часть избранных Божиих от Господа  
получивый, сподоби и нас в мире и покаянии  
живот свой скончати, и Царствия Божия  
наследники быти, идеже ты водворяешися со  
ангелы и всеми святыми, хваля Бога в Троице  
славимаго, Отца и Сына и Святаго Духа, во веки  
веков. **Аминь.**